

Pa fin di siman mudanza mester ta termina

# Dos persona lo ta causa problema na Reinigingsdienst

ORANJESTAD(AAN)— Pa un grupo di trahador di Reinigingsdienst, e mudanza pa San Nicolas no tabata agradable, ya cu por ehemplo nan a bay

traha mas leo for di cas. Pero problemanan a worde solucioná y aparentemente dos miembro di personal ta sigui causa cierto problemanan. Se-

gun DIARIO tin entendi, hasia por spera cu proximamente e sindicato di trahadornan di Gobierno, Gaba, lo distancia su mes di loke e trahadornan aki

ta haci.

Mientras tabata tin rumormen ta circula cu por spera problema na Reinigingsdienst, ayera tur cos tabata parece di ta tranquil na e servicio.

E departamento a muda pa San Nicolas y ya no ta forma parti mas di DOW, pero ta un servicio ariba su mes.

E mudanza no a topa cu completo satisfaccion di tur hende. For di promer instancia tabata visto, cu tabata tin un grupo di trahador, cu tabata di opinion cu awor trabao ta keda mas leo for di cas.

E problemanan cu tabata muestra di ta hopi grandi, lo a solucionan nan mes gradualmente y poco poco tur hende ta conforma nan mes cu e situacion nobo, segun DIARIO tin entendi.

Sinembargo lo tin dos trahador cu lo ta causa

cierto problemanan y lo ta trata di crea den vista di publico un situacion cu no ta existi.

Asina ayera tabata worde spera cu lo tin accion na Reinigingsdienst, caminda sinembargo tur cos a bay completamente tranquil y tur hende a traha normalmente.

Mientras Reinigingsdienst a muda, a keda cierto cosnan pa atende. Asina ta conoci, cu mester bay reemplaza e material cu ta traha cune. Tin cierto trucknan cu mester a worde cambia caba, pero a warda cu compra di trucknan nobo a base di e economizacion den seno di Gobierno.

Awor gestionnan ta worde haci pa cumpra truck nobo pa asina por reemplaza material cu ta worde usa pa e servicio, cu ta conta cu 170 miembro di personal.

## Preguntanan encuan to compra edificio di Sr. Eloy Arends

ORANJESTAD(AAN) — En conexio cu compra di e edificio di sr. Eloy Arends door di Gobierno a sali den DIARIO di Diamars 2 Februari 1988 bao di e cabez "Ministro Don Mansur encuan to compra edificio Arends, Erronan di pasado no por ripiti" e siguiente declaracion di sr. Ministro Don Mansur.

"E gobernante a enfatiza cu Gobierno no kier ripiti erronan di pasado ora a permiti parti di historia y herencia bay perdi, sin actua. Un di e edificionan mas bunita di Aruba, Castillo, a bay perdi pa motibo cu gobierno no a actua na tempo, na opinion di Ministro Man-

sur cu a muestra cu si den e caso aki no a actua, e edificio aki tambe lo a bay perdi".

Relaciona cu e articulo aki miembro di Staten, G. Bareño a haci e siguiente preguntanan na e Ministro di Bienestar General.

1. Sr. Ministro por informa Parlamento si den e negociacionnan pa compra di e edificio Arends en cuestion Stichting Monumentenzorg a worde envolvi?

2. Si e contesta ariba e promer pregunta ta afirmativo, kico tabata e consejo di e Stichting encuan to e edificio Arends como monumento?

3. Sr. Ministro por duna di

conoce ki criterio a worde usa cu a conduci na considera e edificio en cuestion un monumento?

4. Sr. Ministro por informa a base di cual criterionan e warda di polis bieuw no a worde considera como un monumento, cu mester a worde conserva como tal?

5. Sr. Ministro por duna un resumen di otro edificionan cu ta bini na remarca pa worde considera como monumento?

6. Sr. Ministro por duna informacion encuan to su intencion pa adapta e ley di monumento cu a worde tuma over di Antillas Huelandes y den ki fase e ehecucion di e plan aki ta?

## Cartanan pa gremionan lo sali proximamente

## Secretario fulltime pa Consejo Social Economico

ORANJESTAD(AAN)— Proximamente tur gremio lo ricibi un invitacion pa nombra nan representante. E parti di compensacion a keda regla. Mientrastanto gestionnan ta worde realiza pa yega na un Secretario Fulltime pa SER, esta Consejo Social Economico.

Den e Consejo Social Economico, representante nan di gremionan lo tin participacion. Nan lo mester keda apunta pa e gremionan, esta sindicatonan y comercio. Cartanan di parti di Gobierno pa invita e diferente gremionan pa nombra nan representantenan, ta den proceso di worde manda, segun DIARIO tin entendi.

Aparentemente ya den seno di Consejo di Ministro a yega na establecimiento di e compensacion cu e miembronan di SER lo ricibi pa cada reunion

cu nan atende.

Manera informenan ta indica, ariba termino corto SER lo cuminsa funciona y pa haci e funcionamiento bay na forma mas eficaz a

keda dicidi cu lo bay nombra un Secretario Fulltime pa e Consejo. Proximamente lo publica avisanan den cual ta pidi esnan cu ta califica pa solicita.

## Fundacion pa Museo Historico di Aruba

ORANJESTAD(AAN)— Proximamente un fundacion cu lo mester atende cu Museo Historico di Aruba lo mira luz.

Informenan a indica cu e proceso ya a worde inicia y cu Notario ta prepara e documentonan necesario.

Presidente di e Fundacion lo bira señor Julio Maduro, persona cu a realiza hopi trabao pa e

Museo por a bira realidad.

Awe e grupo cu ta ocupa su mes cu e Museo lo sigui reuni y lo bay asigna personanan cu lo ocupa e diferente puestonan den directiva di e fundacion.

Aparentemente hopi plan a worde prepara pa e Museo Historico, cu lo sigui dilanti como un fundacion.



Ayera un avion di Viasa aparentemente tabata den problema ora e tabata acercando Aruba. Alarma a worde bati y tanto brandweer como ambulance tabata warda e avion ateriza pa dreña den accion. Tur e preparacionnan no tabata necesario pasobra e avion a ateriza sin ningun problema.

## Ministro Mansur a discuti acuerdo cu Exxon den Staten

ORANJESTAD(AAN)— Antayera Ministro Don Mansur di Asuntonan Economico, ariba su propio peticion, a reuni cu Staten. Objetivo di e reunion interno tabata, pa duna Staten tur informacion encuan to e acuerdo cu Exxon.

Tabata trata di un reunion di Comision Central di corto duracion.

E Ministro a duna informacion y miembronan di Staten a haya oportunidad pa haci pregunta.